

Morning Dogri (NSD) Bulletin 20-10-2025

आकाशवाणी

Headlines

1. प्रधानमंत्री नरेंद्र मोदी होरें देशवासिएं गी ध्यारें दे रूतै दरान स्वदेशी माल-समेयान खरीदिए 140 करोड़ भारतीयें दी मेहनत दा जश्न मनाने दा आह्वान कीता ऐ। उनें नागरिकें गी आखेआ जे ओह ध्यारें दरान खरीदे गेदे समेयान गी सोशल मीडिया उप्पर बी सांझा करन।
2. मुख्य भरै च अज्ज देआली दा ध्यार पारम्परिक जोश ते जज्बे कन्नै मनाया जा'रदा ऐ।
3. राष्ट्रपति द्रौपदी मुर्मू, उपराष्ट्रपति सी.पी राधाकृष्णन ते प्रधानमंत्री नरेंद्र मोदी होरें देशवासिएं गी देआली दे ध्यार दी शुभकामनां दितियां न।
4. रेलवे मंत्री अश्विनी वैशणव होरें रातीं चिरें जनेई रेलवे अधिकारियें कन्नै आनंद बिहार रेलवे स्टेशन दा दौरा लाया ते देआली ते छठ ध्यार दरान यात्रियें आस्तै कीते गेदे बंदोबस्तें दा जायजा लैता।
5. बिहार च विधानसभा चुनांस दे दुए चरण आस्तै नामांकन दाखिल करने दा अज्ज खीरी ध्याड़ा ऐ।
6. महिला क्रिकेट च विश्व कप प्रतियोगिता च जंदी रातीं इंदौर दे होल्कर स्टेडियम च खेड्ढे गेदे इक मैच च इंग्लैंड दी टीम नै भारत गी 4 रन्जें कन्नै हराई दिता।

<><><><><><>

PM-Swadeshi

प्रधानमंत्री नरेंद्र मोदी होरें देशवासिएं गी ध्यारें दे उत्सव दरान स्वदेशी माल-समेयान खरीदिए 140 करोड़ भारतीयें दी मेहनत दा जश्न मनाने दा आहवान कीता ऐ। प्रधानमंत्री नरेंद्र मोदी होरें देशवासियें गी ध्यारें दे उत्सव दरान स्वदेशी माल-समेयान खरीदने दा आहवान कीता ऐ। प्रधानमंत्री होरें लोकें गी खरीदी गेदी चीजें-बस्तें गी सोशल मीडिया पर सांझा करने दा आहवान कीता ऐ। उनें आखेआ जे दुए लोकें गी बी उआं करने दी प्रेरणा देग। इक सोशल मीडिया पोस्ट च प्रधानमंत्री होरें स्वदेशी माल खरीदने दी लोड़ पर जोर भरेआ ते गर्व से कहो यह स्वदेशी ऐ, दा हिस्सा बनो। इस पैहलकदमी दा समर्थन करदे होई Mygov India आसेआ Celebrate Diwali and Empower स्वदेशी अभियान चलाया गेआ ते लोकें गी ध्यार आहलें उत्सव दरान छड़ा स्वदेशी समेयान खरीदने दा प्रण पाने दा आहवान कीता गेआ। एह अभियान मुकामी दस्तकारें गी बढ़ावा देने दे महत्व गी उजागर करदा ऐ। इक स्नेह च My gov India पर प्रधानमंत्री मोदी हुंदे आसेआ वोकल फॉर लोक राहें मुकामी दस्तकारें गी बढ़ावा देने महत्व गी उजागर कीता गेआ। इस अभियान गी उपभोक्ताएं च जागरूकता ते मान-सम्मान बधाने दे मकसद कन्नै शुरू कीता गेआ ऐ।

<><><><><><>

Diwali

देआली दा त्यौहार अज्ज पूरे देश च धार्मिक श्रद्धा ते हर्षोल्लास कन्नै मनाया जा'रदा ऐ। बुराई पर अच्छाई दे प्रतीक देआली दे ध्यार उप्पर लोक घरें-मंदरें गी दीएं कन्नै रौशन करदे न। शैहरें-गलियें ते बजारें गी शैल सनाहकड़े ढंग्गै कन्नै सजाई दिता जंदा ऐ। देआली दे पावन अवसर उप्पर लोक मां लक्ष्मी दी पूजा-अर्चना करदे न। राश्ट्री राजधानी दिल्ली च लोक देआली मनाने लेई बक्ख-बक्ख बजारें च स्वदेशी चीजें-बस्तें दी खरीदारी च रूज्जे दे न। देआली दे मौके उप्पर दिल्ली पुलस नै सुरक्षा दे निग्गर इंतजाम कीते दे न।

<><><><><><>

Diwali Greetings

देआली दे शुभ त्यौहार उप्पर राश्ट्रपति द्रोपदी मुर्मु, उपराश्ट्रपति सी.पी राधाकृष्णन होरें देशवासियें गी बधाई दिती ऐ। अपने स्नेह च राश्ट्रपति होरें आखेआ ऐ जे देआली भारत दे सभनें शा प्रसिद्ध ध्यार शा इक्क ऐ। बुराई पर अच्छाई दी जित्त दा प्रतीक इस ध्यार गी लोक चार्यें-चार्यें मनांदे न। राश्ट्रपति होरें आखेआ जे देआली दा ध्यार आत्मचिंतन ते आत्म सुधार दी प्रतीक ऐ जेड़ा आपसी प्रेम ते भाईचारे दा स्नेहा दिंदी ऐ। राश्ट्रपति होरें सभनें गी देआली जिम्मेदारी, सुरक्षा ते पर्यावरण दे स्हाबे मनाने दा आग्रह कीता। उनें सभनें दी सुख-शांति ते समृद्धि दी कामना बी कीती। अपने स्नेह च उपराश्ट्रपति सी.पी राधाकृष्णन होरें आखेआ जे देआली ओह समें ऐ जदूं भारा दे लोकाचार च समाई दी उदारता, दान ते समावेश दे मूल्ल साफ तौरा पर उजागर हुंदे न। उनें

मां लक्ष्मीं अग्गे सभनें दी सुख-शांति दी प्रार्थना कीती। प्रधानमंत्री नरेंद्र मोदी होरें बी देशवासियें गी देआली दी शुभकामनां दितियां न। उनें प्रार्थना कीती ऐ जे देश च हर पास्से सकारात्मकता दी भावना पैदा होऐ। लोकसभा स्पीकर ओम बिरला होरें देशवासियें गी देआली दे शुभ ध्यार दी मुबारकबाद दिती ऐ।

<><><><><><>

Vaishnav-Trains

रेल मंत्री अश्विनी वैष्णव होरें रेलवे अधिकारियें कन्ने कल राती आनंद विहार रेलवे स्टेशन दा दौरा कीता ते देआली ते छठ ध्यार दे मद्देनजर यात्रियें आस्तै कीती गेदी बवस्था दा जायजा लैता। इस दौरान उनें यात्रियों कन्ने गल्लबात बी कीती ते उनेंगी दिती जा'रदी सुविधाएं बारै बी उंदी प्रतिक्रिया लैती। श्री वैष्णव होरें इक सोशल मीडिया पोस्ट च आखेआ जे देआली ते छठ ध्यार दे मौके पर दिल्ली दे स्टेशनें पर बड़ी बद्द गिनतरी च यात्री औंदे न ते रेलवे ने उंदी सुविधा आस्तै व्यापक बंदोबस्त कीते दे न। उनें अग्गे आखेआ जे होल्डिंग एरिया ते बड़ी बद्द गिनतरी च टिकट काउंटरें पर यात्रा गी असान बनाई दिता ऐ। उनें आखेआ जे रेल मंत्रालय नै मुंबई, पुणे, सूरत, बेंगलुरु ते सिकंदराबाद दे स्टेशनों पर बी इये ज्नेइयां सुविधां उपलब्ध कराईयां न।

<><><><><><>

Election Nominations

बिहार च विधानसभा चुनांस दे दुए चरण आस्तै नामांकन दाखिल करने दा अज्ज खीरी ध्याड़ा ऐ। कुल 243 सीटें चा 20 जिलों दी 122 सीटें पर 11 नवंबर गी इस चरण वोट पाए जान। बिहार विधानसभा चुनांस दे पैहले चरण गितै अज्ज नामांकन वापस लैने दी खीरी तरीक बी ऐ। इस गेढ़ तैहत 6 नवंबर गी 18 जिलें दी 121 सीटें पर मतदान होग ते वोटें दी गिनतरी 14 नवंबर गी होग।

<><><><><><>

Weather

मौसम विभाग नै अज्ज केरल और माहे दे किश हिस्सें च तेज़ बरखा दी पेशगोई कीती ऐ। अंडमान ते निकोबार द्वीप समूह, आंध्र प्रदेश, तटीय ते दक्खण कर्नाटक, लक्षद्वीप, तमिलनाडु, पुदुचेरी ते कराईकल च बी अगले 2-3 दिनें च बरखा दी मेद दस्सी गेई ऐ। मौसम विभाग नै अज्ज ओडिशा, दक्खण कर्नाटक, अंडमान ते निकोबार द्वीप समूह, केरल, माहे ते लक्षद्वीप दे किश हिस्सें च गरज ते बिजली कडकने दे बी असार न।

<><><><><><>

Israel Gaza

इस्राइली रक्षा बलें - आईडीएफ नै गाजा च कई हवाई हमलें दे बाद संघर्ष विराम समझौते गी फही लागू करने दी घोषणा कीती ऐ। इक सोशल मीडिया पोस्ट च, आई.डी.एफ. ने आखेआ जे ओह संघर्ष विराम समझौते दा पालन करना जारी

रक्खोग पर, जेकर एहदा उल्लंघन कीता गया ते ओहदा बनकदा परता दिता जाग। एहदे थमां पैहले आईडीएफ ने आखेआ हा जे उन्नै गाजा च हमास कन्नै जुड़े दे दर्जनै ठकानै गी निशाना बनाइयै ब्हाई हमले कीते। इन्दे च थेआर भंडारण केन्द्र, गोलीबारी दी थाहें, आतंकवादी सेल ते करीब 6 किलोमीटर लम्मी भूमिगत सुरंगां शामिल हिया, जिंदा इस्तेमाल कथित तौर पर इस्राइल दे खिलाफ हमलें आस्तै कीता जंदा हा।

<><><><><><>

Women Cricket

महिला क्रिकेट च विश्व कप प्रतियोगिता च कल इंदौर दे होल्कर स्टेडियम च खेड्ठे गेदे इक मैच च इंग्लैंड दी टीम नै भारत गी 4 रन्जें कन्नै हराई दिता। इंग्लैंड आसेआ रक्खे गेदे 289 रन्जें दा पिच्छा करदे होई भारत दी टीम 6 विकटें दे नुकसान पर 284 रन्ज गै बनाई सकी। इस मैच च स्मृति मंधाना नै 88, हरमनप्रीत कौर नै 70 ते दीप्ति शर्मा नै 50 रन्ज बनाए। पैहले बल्लेबाजी करदे होई इंग्लैंड दी टीम नै 8एं विकटें दे नुकसान पर 288 द्रौड़ां बनाइयां। इस जित्त कन्नै इंग्लैंड दी टीम नै सेमीफाइनल च अपनी थाहर पक्की करी लैती ऐ। भारत गी हुन अपने दुए सब्बै मैच जितने होडन। अज्ज मुम्बई दे डी.वाई पाटिल स्टेडियम च श्रीलंका दा मैच बांग्लादेश कन्नै होग।

<><><><><><>